

Na osnovu člana 56. Zakona o organizaciji organa uprave u Federaciji Bosne i Hercegovine („Službene novine Federacije BiH“, broj 35/05), federalna ministrica kulture i sporta objavljuje

POZIV ZA ISKAZIVANJE INTERESA

za kandidovanje programa i projekata od posebnog značaja za kulturu u Federaciji Bosne i Hercegovine radi planiranja Programa utroška sredstava za Transfer kulture od značaja 2026. godinu

Poziv za iskazivanje interesa objavljuje se radi prikupljanja prijedloga programa i projekata od posebnog značaja za kulturu u Federaciji Bosne i Hercegovine, u svrhu utvrđivanja prioriteta i planiranja Odluke o usvajanju Programa utroška sredstava i kriterijima raspodjele sredstava tekućeg transfera – „Transfer za kulturu od značaja za Federaciju BiH“, program „Projekti kulture od značaja za Federaciju BiH“, utvrđenog Budžetom Federacije Bosne i Hercegovine za 2026. godinu Federalnom ministarstvu kulture i sporta – Federalnom ministarstvu kulture i športa.

Ukupni iznos sredstava planiranih za program „Projekti kulture od značaja za Federaciju BiH“ iznosi 2.130.000,00 KM.

Podnosioci mogu iskazati procijenjenu potrebu za sufinansiranje programa ili projekta u iznosu od 35.000,00 KM do 350.000,00 KM.

Podnošenje prijedloga ne predstavlja osnovu za sticanje prava na dodjelu sredstava.

I Cilj poziva

Cilj Poziva je prikupljanje informacija i prijedloga radi utvrđivanja prioriteta i planiranja Programa utroška sredstava za Transfer kulture od značaja 2026. godinu, sa posebnim naglaskom na programe i projekte u oblasti kulture koji se svojim sadržajem, značajem, obimom, jubilejom, tradicijom ili drugim posebnim obilježjima izdvajaju od redovnih programa i projekata u oblasti kulture, imaju poseban značaj za kulturu i kulturno naslijeđe Bosne i Hercegovine i Federacije Bosne i Hercegovine te su u skladu sa relevantnim ciljevima Strategije razvoja Federacije Bosne i Hercegovine.

II Pravo podnošenja zahtjeva

Pravo podnošenja zahtjeva na ovaj Javni poziv imaju organizacije, udruženja, zajednice i drugi nosioci koji obavljaju djelatnosti u oblasti kulture u Federaciji Bosne i Hercegovine, sem privatnih organizacija osnovanih sa ciljem ostvarivanja profita.

III Kriteriji za utvrđivanje posebnog značaja

Osnovni kriterij za razmatranje prijedloga je poseban značaj programa ili projekta za kulturu u Federaciji Bosne i Hercegovine.

Programom ili projektom od posebnog značaja može se smatrati program ili projekt koji ispunjava najmanje tri od sljedećih kriterija:

1. predstavlja obilježavanje jubileja, godišnjice ili događaja od naročitog kulturnog značaja koje nadilaze do sad utvrđivane kriterije podrške;

2. svojim značajem i efektima nadilazi lokalni ili kantonalni nivo;
3. doprinosi očuvanju, zaštiti, prezentaciji ili afirmaciji kulturnog i umjetničkog naslijeđa Bosne i Hercegovine;
4. uključuje ili povezuje relevantne kulturne institucije, organizacije, umjetnike ili druge aktere iz više sredina ili područja;
5. ima dokazanu dugogodišnju kulturnu, umjetničku ili društvenu vrijednost i kontinuitet;
6. ima međunarodni značaj ili doprinosi međunarodnoj afirmaciji kulture Bosne i Hercegovine;
7. svojim obimom, sadržajem, značajem ili jedinstvenošću opravdava institucionalnu podršku na nivou Federacije Bosne i Hercegovine.

Ispunjavanje navedenih obilježja samo po sebi ne predstavlja osnovu za sticanje prava na finansijsku potporu.

IV Dokumentacija

Podnosilac uz prijedlog dostavlja zahtjev, obrazloženje programa ili projekta i prijedlog finansijskog iznosa, iz kojih treba biti jasno vidljivo po čemu se predloženi program ili projekat izdvaja od redovnih aktivnosti podnosioca i zbog čega ima poseban značaj za kulturu u Federaciji Bosne i Hercegovine.

Obrazloženje treba sadržavati:

- opis programa ili projekta i njegovih ciljeva;
- obrazloženje posebnosti značaja programa ili projekta;
- podatke kojima se obrazlaže ispunjavanje najmanje tri obilježja iz tačke III ovog Poziva;
- planirane aktivnosti i očekivane rezultate;
- ukupna vrijednost programa ili projekta te prijedlog iznosa potrebnog sufinansiranja.

Federalno ministarstvo kulture i sporta može od podnosioca zatražiti dodatna pojašnjenja i dokumentaciju potrebnu za procjenu posebnog značaja, opravdanosti, mogućnosti realizacije i finansijskog obima predloženog programa ili projekta.

V Razmatranje prijedloga

Federalno ministarstvo kulture i sporta razmotrit će pristigle prijedloge sa stanovišta njihovog posebnog značaja za kulturu u Federaciji Bosne i Hercegovine, usklađenosti sa strateškim prioritetima, opravdanosti predloženog finansijskog iznosa i mogućnosti realizacije u budžetskoj 2026. godini.

Na osnovu provedene procjene Federalno ministarstvo kulture i sporta može Vladi Federacije Bosne i Hercegovine predložiti da se programi i projekti za koje je utvrđen poseban značaj za kulturu u Federaciji Bosne i Hercegovine uvrste u prijedlog Programa utroška sredstava, uz navođenje nosioca programa ili projekta, njegove namjene, predloženog iznosa sredstava, očekivanih rezultata te uslova korištenja i praćenja namjenskog utroška sredstava.

VI Način i rok dostavljanja

Prijedlozi se dostavljaju na adresu:

Federalno ministarstvo kulture i sporta –
Federalno ministarstvo kulture i športa
Obala Maka Dizdara 2
71 000 Sarajevo

Rok za dostavljanje prijedloga je 31. 3. 2026. godine.

VII Napomena

Ovaj Poziv nema karakter javnog poziva za dodjelu budžetskih sredstava nego predstavlja postupak iskazivanja interesa i prikupljanja prijedloga radi utvrđivanja prioriteta i pripreme Programa utroška sredstava.

Podnošenjem prijedloga podnosilac ne stiče pravo na dodjelu budžetskih sredstava niti obavezu Federalnog ministarstva kulture i sporta da predloženi program ili projekat uvrsti u prijedlog Programa utroška sredstava.

Uvrštavanje programa ili projekta u Prijedlog programa utroška ne predstavlja pravo podnosioca na dodjelu sredstava.

Konačnu odluku o Programu utroška sredstava donosi Vlada Federacije Bosne i Hercegovine, a dodjela i korištenje sredstava provode se u skladu sa Odlukom Vlade Federacije Bosne i Hercegovine, Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine i drugim važećim propisima.